

Embargo anfignen gievgia, igls 30-04-2020, allas 06.00

**Communicaziun da medias digl cumegn da Surses
(nr. 2-2020)**

Surses: Suprastanza e cunsegl da scola vottan star tar igl rumantsch grischun

La suprastanza communal ed igl cunsegl da scola on decida da sottametter alla radunanza communal la proposta da mantigneir igl rumantsch grischun scu lungatg d'alfabetisaziun an scola. En'iniziativa inoltrada gl'onn passo pretenda da reintrodueir igl rumantsch surmiran. La decisiun finala davart igl lungatg da scola surstat alla radunanza communal. En termin per la votaziun è dantant betg anc fixo.

L'iniziativa pretenda da reintrodueir sen igl onn da scola 2021/22 puspe igl rumantsch surmiran ainten la scola da Surses, an pe digl rumantsch grischun. La suprastanza ed igl cunsegl da scola on decida da betg sustigneir chell'iniziativa mabagn da proponer agl suveran d'alfabetisar er venavant igls scolars an rumantsch grischun. An discussiun stava da sottametter allas votantas ed agls votants ena cunterproposta, tgi vess p.ex. previa d'instrueir ainten la scola primara rumantsch surmiran e midar ainten la scola superioura tar igl rumantsch grischun. Da far en tal masditg da lungatgs vign pero scunsiglia tant dalla magistraglia scu er digl inspectorat da scola. Per tala raschung ò la suprastanza decida da desister da far ena cunterprosta. Igl suveran stuaro damai decider da star tar igl rumantsch grischun u da midar tar igl rumantsch surmiran.

Procedura e termins

An connex cun l'iniziativa era betg cler tge organ communal tgi fiss competent da decider davart la midada digl lungatg da scola, la radunanza communal u igl cumegn d'urna. Siva aveir sclaria chella dumonda da moda manedla è la suprastanza neida alla conclusiun tgi la radunanza communal è competent per decider an tgossa. Igl madem mument ò chella numnadamaintg er da decider davart la revisiun correspondentia digl urden da scola. Ainten chel era anfignen ossa betg menziuno igl lungatg da scola. An connex cun l'iniziativa stò igl urden da scola damai neir revidia. Tot tenor la decisiun dalla radunanza communal ò da neir stipulo ainten chel tg'igl lungatg da scola seia igl rumantsch grischun u igl rumantsch surmiran.

Avant tg'igl suveran ò da piglier ena decisiun an tgossa vign la suprastanza, an consultaziun cun igl comite d'iniziativa, ad organisar ena seira d'infurmaziun cun ena discussiun agl podi. Perveia dallas maseiras concernent igl coronavirus ègl dantant betg anc pussebel da fixar datums concrets per occurrenzias pi grondas. Gl'è previa da salvar tant la seira d'infurmaziun scu er la radunanza communal schi spert tgi la situaziun lubescha puspe chegl. La populaziun niro an mintga cass infurmada ad ouras davart igls termins dalla seira d'infurmaziun e dalla radunanza communal e vign a survagneir scu usito en messadi detaglea ansemen cun l'invitaziun alla radunanza communal.

Igls cumegns an Surses vevan decida d'introdueir sen igl onn da scola 2007/08 igl rumantsch grischun an scola. Oz vign anc instrua rumantsch grischun ainten las scolas da Surses e Lantsch (incl. igl consorzi da scola Val Alvra dafora) scu er ainten las scolas bilingas da Trin, Domat e Coira. Oters cumegns rumantschs tgi vevan er decida d'alfabetisar igls unfants an rumantsch grischun on mido gio siva pacs onns anavos tar lour idiom.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 28 d'avregl 2020